

卷二十五

書名 小倉山房詩集三十六卷 咸豐元年序番禺謝氏梅花詩屋刊本
 撰者 清 袁枚 撰，清 謝有仁 注
 卷 卷二十五
 內容分類 集-別集-清中葉前期
 索書號 夕嵐草堂.S4103
 編號 90434

[彩色首頁1](#)

[東洋文化研究所漢籍目錄 編號: 90434](#)

[東洋文化研究所漢籍目錄所藏漢籍善本全文影像資料庫 索書號: 夕嵐草堂.S4103](#)

[漢籍善本全文影像資料庫文本小倉山房詩集三十六卷 咸豐元年序番禺謝氏梅花詩屋刊本](#)
 版權所有: [東京大學](#) [東洋文化研究所](#)

[使用上的注意事項](#)

小倉山房詩集卷一 丙辰丁巳

番禺謝有仁靜山註

男鴻恩堯階校字



錢唐江懷古

注上錢王舊蹟多我來重唱百年歌勸王妙選三千弩

不射江湖射汴河

錢王

蘇軾游靈隱寺得來詩復用前韻詩君不見錢塘湖錢王壯觀今已無

百年歌

樂府詩集陸機百年歌十首五代史唐莊宗紀初
 克用置酒三垂岡伶人奏百年歌時存勗在側方
 五歲克用慨然將其鬚指而笑曰吾行老矣此奇
 兒也後二十年其能代我戰於此乎及天祐五年
 攻梁夾寨伏三千弩蘇軾八月十五日看潮五絕
 兵於此破之三千弩詩安得夫差水犀手三千強
 弩射潮低案吳越備史梁開平四年八月錢武肅
 始作捍海塘王因江濤衝激命強弩五百以射潮
 頭既而潮汴河在開封府滎陽縣達
 遂趨西陵汴河府城西至中牟界
 附錄隨園詩話或嘗

小倉山房詩集卷一 梅花詩屋

雨中志感

花朝日戲諸姬

阻風京口

[Faint bleed-through text from the reverse side of the page, including characters like '雨', '風', '京', '口', '中', '志', '感']

小倉山房詩集卷二十五

丙申丁酉

番禺謝有仁靜山註

男鴻恩堯階校字

正月十五日園中飛下一鶴

一團白雪青天落園丁走報來仙鶴來自何方產何土
鶴不能言但起舞園中三鶴一鶴單物得其偶居之安
主人當作不速客取蒼筤之敬終吉

不速客二句

易經需卦上六入於穴有不速之客
三人來敬之終吉象曰不速之客來

敬之終吉雖不
當位未大失也

哭座主鄧遜齋先生

有序

戊午科余與平西大將軍阿公廣庭同出先生
門下先生每稱分校得士一文一武今年正月

將軍平定金川而先生先一年捐館故賦詩
志哀先生諱時敏四川人官大理寺卿

當年絳帳同升客此日凌烟第一勛共說門墻原不忝
敢云文武竟平分名書虎榜三生夢甲洗龍沙萬里雲
告奠九原公亦笑是誰衣鉢有將軍

過瞻園弔託師健尚書

十年不見託尚書重過瞻園感舊居匝地風光春事換
滿墻烟墨雨痕疎老臣力盡還朝後國士知深見面初
擬賦八哀詩未就幾行衰淚落衣裾杜甫有八哀詩

哭逸園主人

主人姓程名鍾字在山吳之隱君子也與其妻

生香居士全有詩名所居逸園在西磧山下余
過訪不值次日君入城始得一見別後再投以
詩而君亡矣其佳句云高樓鎮日無人到賸有
山妻問字來可以想其風調

與君一見了前緣芳訊重投便杳然四海名園推梓澤
半生嘉偶伴伶元似知數盡將山賣子到園時聞已售與江氏定有

詩存待我傳西磧風煙太湖月從今不泛子猷船

伶元

蘇軾朝雲許恰如通德伴伶元案伶元買妾樊通德頗能言趙飛燕姊弟事故為作外傳

雞

養雞縱雞食雞肥乃烹之主人計自佳不可使雞知

送保將軍勵堂之施南

吳下驪歌夾耳聞我來剛值送將軍請看江上雙旌影
已似將飛一片雲

履曳星辰劍上方偏教生性愛文章倉山幾曲風華調
君盡能歌我轉忘

千條紅燭兩枝花餞別依依小杜家 開周 他日巴山聽
夜雨更誰行酒進琵琶

弓刀獵罷萬山青風捲紅旗過洞庭可帶橫塘一枝笛
夜深吹與老龍聽

善撫生苗與熟苗追陪嚴武與韋臯八風平處雙聲穩
一卷新詩卽六韜

隋書經籍志太公六韜五卷案六韜文韜武韜龍韜虎韜豹韜犬韜

送君南浦草萋萋望見楊花首欲低一樣天涯送行客
楊花能到夜郎西

過蘇州有懷南溪太守新遷觀察轉漕北行

六十黃堂兩鬢清一朝 丹詔下神京高年豈望遷官

職 聖主偏能記姓名緩緩漕糧東魯去煌煌衣錦故

鄉行長河月色三千里萬艣齊聽號令聲

袁絲別後下姑蘇悔作尋春范大夫知己偶然心上有

美人真覺世間無難將蘭漿迎桃葉且坐甘棠聽鷓鴣

愁過南衙文讌處旌旗人遠月明孤

哭侍衛明公 有序

公名仁將軍忠烈公名瑞者之弟年少能詩在

尹相國處見子篇詠寄聲索贈予感其意書扇
貽之而公已從征金川歿於軍矣

遠蒙京國問才名知己何曾一識荆團扇詩才從北寄
雕弓人已賦西征通侯門第文兼武上將沙場死亦生
遙奠寒雲招左轂海天兜率盡交情

左轂

禮記士大夫死於道則升兜率見卷十五諸
其乘車之左轂以其級復兜率知己詩第四

注首

某學士已謫降矣猶責余不以公服相迎余雖謝
過而退後不能無詩

何苦蓬門閣閣譁私蛙猶道是官蛙一枝紅蓼雖孤潔
生就人間瑣碎花

官蛙句

晉書惠帝在華林園聞蛙鳴問曰為官乎
為私乎侍中賈允對曰在官地為官在私
地為私帝曰若
是官蛙可給廩

眼入夜昏澁見燈輒睽戲賦二詩

薄暮雙眉蹙飛珠繞眼眶望洋空有嘆視物總如傷無
復宵攤卷何妨蚤就床譬如人世上原自沒燈光

望洋嘆

莊子河伯行至於北海東面而視不
見水端始旋其面目望洋向若而嘆

秉燭宵遊興忽差倍教白日惜年華想來老亦多情累
兩眼渾如夜合花

升沉

山色蒼茫落炤微升沉到處有天機楊花自繞蛛絲上
莫怪春風吹不飛

江西方伯楊西峯巡撫江蘇五月受篆寄賀四章
故人開府到吳中捧日葵花色正紅八座有誰堪此席
半生惟我最知公智珠在手風雲濶卿月當天氣象空
真個恩膏似流水大江西下大江東

金閫何處不甘棠回首春風二十霜公宰昭文時年才弱冠在昔

東廂聽鼓角於今南面握牙璋官從舊地遷才樂人是

相知喜更狂料得軍民齊額手中丞玉貌未曾蒼

記否當年聚白門兩家燈火話黃昏一餐不作常賓待

萬事都從絕頂論公精廚饌他客不得與宦海光陰流水逝棲霞

遊伴幾人存謂莊潘諸公而今半壁東南主為我應留酒百

尊

小人有母受恩施客歲稱觴使者馳雙東冰絲園客繭
一行珠字白華詩情深膠漆真無忝分隔雲泥兩不知

寄語關西楊太尉相尋未敢出山遲

園客繭神仙傳園客者濟陰人常種五色香草服食其實忽有五色蛾集草上客收而薦之

以布生華蠶焉至蠶時有一女自來助客養蠶得繭大如食纈絲與客俱仙去白華詩詩序

白華美孝子之潔也

贈慶郎

寂寂朱門當館娃行行珠字傍牕斜世間只有張公子

竹齋解采華林班名第一花

蛺蝶雌雄且莫分女兒香贈女兒熏遙知燒處雙煙起

化作仙童一朵雲

欲試芙蓉雨後粧青溪同浴兩鴛鴦分明一掬僧房水
抵得華清第二湯

客牕寒重夜眠遲贈汝吳棉有所思願得他生爲翠被
鄂君身上覆多時

齒痛悶坐戲作長歌

前有萬古去漠漠後有萬古來滔滔當中忽放我一人
不前不後生今朝孫曾以後之人物不接見開闢以前
之史冊誰傳抄徒然苦受蒼頡累四千年中文字來煎
熬就使學業追孔孟勳業同夔臯猶恐一朝乾坤毀也
如雲氣隨風飄何況硜硜居空谷寂寂守蓬茅五岳不
曾走蠟屐六十尙未麾旌旄造化小兒漸欺我齒痛呼

暑聲嗷嗷眼前未死先冥漠詭談傳世不朽殊無聊擬
學古之行樂人酒飲公孫穆色好公孫朝已爲財力所
制限名教所阻撓再欲將身送還天與地又被殘形恆
幹相拘膠只得支頤枯坐無一語自弄筆墨當笙簫甯
戚高歌白石爛杞人自信青天牢方寸之間驅水火八
荒以外馳輪尻身隨黃頰青曾歿處歿魂憑白蜺嬰拂
招時招但願生生世世莫作有情物一任劫灰盪滌吹
我作泰山之頑石大海之波濤

造化小兒

見卷十七舟中作
三韻詩第三首

公孫穆二句

列子楊
朱篇子

產相鄭鄭國以治諸侯憚之而有兄曰公孫朝有
弟曰公孫穆朝好酒穆好色朝之室也聚酒千鐘
積麴成封望門百步糟漿之氣逆於人鼻方其荒
於酒也不知世道之安危人理之悔吝室內之有

亡九族之親疎存亡之哀樂也雖水火兵刃交於前弗知也穆之後庭比房數十皆擇稚齒媿媿以盈之方其耽於色也屏親暱絕交游逃甯戚句南於後庭以晝足夜三月一出意猶未愜甯戚句南子甯戚欲干齊桓公困窮無以自達於是為商旅將任車以商於齊暮宿於郭門外桓公迎郊客夜開門辟任車爇火甚眾戚飯牛車下擊牛角而疾商歌桓公聞之曰異哉非常人也命後車載之因授以政其歌曰南山矸白石杞人列子杞國人有爛生不逢堯與舜禪云云杞人憂天崩墜身無所寄廢黃頌句見卷十二為王壽白蜺嬰拂拂當於寢食黃頌句峯題天問圖詩注楚詞白蜺嬰茀胡為此堂注蜺雲之有色似龍者嬰縈繞也茀雲之透迤似蛇者列仙傳崔文子學仙於王子喬子喬化為白蜺而嬰茀持藥與之文子驚怪以戈擊蜺因墮其藥俯而視之喬之尸也須臾化為大鳥飛鳴而去

再贈慶郎

三月春光上已濃笙歌人集水西東樹梢挂起燈如海

照得紅兒分外紅

紅兒雕陰官妓杜紅兒也唐羅虬作比紅兒詩百首

捲簾招月坐蕭齋意欲畱春事竟諧寄語阿瞞私誓了

他生爭及此生佳

阿瞞楊太真外傳明皇在禁中自稱阿瞞

為儂指引若耶溪笑上粧樓躡小梯奪婿吳娘真有福

吹簫全住板橋西

奪婿洛陽伽藍記永安三年爾朱兆入洛陽縱兵大掠有秀容胡騎數十人入瑤光寺姪穢京師語曰洛陽女兒急作髻瑤光寺尼奪作婿

開過紅欄鳥欲飛相思能不夢依依願卿身似春潮長

早到胥江晚即歸

南溪遷江蘇司臬再賀一詩

孔戣久被天心眷重疊 恩綸下玉坡千里人才瞻
舜日三遷官總聽吳歌舟因久泊風彌順花為遲開露
轉多我與蒼生齊引領者番報稱更如何

孔戣乃孔子之後三十八世孫也韓愈尚書左丞孔公誌銘具詳又新舊唐書俱有傳

人老莫作詩

鶯老莫調舌人老莫作詩往往精神衰重複多繁詞香
山與放翁此病均不免奚況於吾曹行行當自勉其奈
心感觸不覺口咿啞譬如一年春便有一年花我意欲
矯之言情不言景景是眾人同情乃一人領

晚游古林寺

一鐘打出滿堂僧佛面金光半閃燈籠樹無聲風小定
袈裟有影月初升講經未必花能笑拄杖微聞石欲應
底事空王夸解脫春來不解半池水

余久離祿仕而戚里紛紛誣諉不已初頗厭之既

乃有悟於物理變嗔為喜故作是詩 誣諉音捶去聲爾雅誣

諉累也注以事相屬累為誣諉

戚里紛紛太糾纏閒思物理忽欣然樹堪避雨多棲鳥
水不通河沙泊船石佛疲津雖欲卧雲仙捨藥且隨緣
人求終比求人好平着心看即是禪

石佛 法苑珠林秦穆公有獲石佛事宋史王賓亦有掘地得石佛事與此無涉 疲津 世

廣公嘗入佛圖見卧佛曰此子疲於津梁斯時以為名言

卅年

卅年山館住悠悠十賚誰交陸敬游插處綠楊成古樹
畜來黃口盡蒼頭釣竿手顫魚難得棋局心忙子不收
只有吟詩如老將窮追佳句獲才休

十賚句

陶洪景有授陸敬游十賚文皮日休詩他年欲事先生去十賚須加陸逸冲案逸冲嘗事陶隱居隱居錫名棲靜處士十賚猶人間九錫也

野廟

白石神君廟黃車使者臨客牕雞語慣僧頂鵲巢深錦
雨通宵暗金苔滿地陰上和香一炷畱贈古檀林

神君

史記上求神君舍之上林中躡氏觀神君者長陵女子以子死見神於先後宛若宛若祠之其室聞其言不見其人云又游水發根言上郡有巫病而鬼神下之上召置祠之甘泉及天子幸

甘泉置壽宮神君壽宮神君最貴者太一其佐曰大祭司命之屬皆從之時書言然常以夜又置壽宮北宮張羽旗設供具以禮神神君黃車使者所言上使人受書其言命之曰書法
漢書藝文志虞初周說九百四十三篇河鵲巢句南人武帝時以方士侍郎號黃車使者
傳燈錄導林禪師至秦望山見長松遂棲止其上復有鵲巢其側人目為鵲巢和尚

折花

看書時是看花時兩事商量割愛遲只好折花書案供
也聞香氣也吟詩

題宋人詩話

元聖雖不作何王不袞裳終日嗜菖蒲未必皆文王孔
子所以聖豈在不撤薑我讀宋詩話嘔吐盈中腸附會
韓與杜瑣屑為夸張有如倚權門凌轢眾老蒼又如據

泰華不復遊瀟湘丈夫貴獨立各以精神強于古無臧
否于心有主張肯如轅下駒低頭傍門墻

悔軒太守長淮利涉圖

長淮泱泱浪拍山舟中太守目營然為貪四顧眼界寬
船篷盡卸船帷寒蕩舟者急腰背彎擊楫者猛鬚連鬚
奚童持帽容清便飄飄華蓋風吹偏隄旁樹底聲喧闐
衙前散從將馬牽兜牟雉尾衝寒烟弓刀旗幟鞍轡棧
一一錯襍楊花間問公何事心憂煎腰輿不坐偏扣舷
客秋河決黃淮連魚頭赤子相比肩救災如救野火燃
黃堂官作羣官先疏排貴迅築貴堅何者宜堵何者穿
非身親到心胡安民視公身如大船捆載萬戶利涉川



精誠所感神亦憐支祁可鎖鼉可鞭饑者與飯寒與棉
波濤聲裏頒金錢非公孰把 皇仁宣雙漿搖去重回
旋左視右視求萬全我聞史起能引泉河隄謁者稱王
延煌煌史冊相畱傳以公作配何慙焉誰知公意猶拳
拳畫圖當作越膽懸道民受病難遽痊元氣可復須三
年此語公然直奏 天

支祈鎖

岳瀆經禹治水獲無支祈形如獮猴力踰九象命庚辰制之鎖於龜山之足淮水乃

安史起

見前漢書王延句溝洫志河決於館陶河

隄使者王延世使塞以竹落長四丈大九圍盛以小石兩船夾載而下之三十六日河隄成又河決平原建始時遣王延世治之

悔軒一稔之中驟遷觀察再遷方伯索詩為賀

兩度 恩綸下玉京三遷官不出江城風高太覺雲行
速惹得閒鷗聽也驚

更喜新衙接舊衙半條街近好移家官遷真個鶯遷似
只隔一牆紅杏花

中山王府舊樓臺迎過 鑾輿花尙開此日遭逢勝元
九遷官兼得住蓬萊

元九二句 元稹詩我是玉皇香案
吏謫居猶得住蓬萊

東南民力近何如儒者經綸定有餘好惜分陰懷祖德
青燈還擷幾行書

東南民力 見卷五洲上寄同官
許南臺詩第三首注

北海尊開酒不辭匡衡翼奉本同師自憐三十年前客

合有瞻園老樹知 與公同出孫文定公門下

匡衡翼奉 漢書翼奉傳奉治齊詩與蕭望
之匡衡同師三人經術皆明

會賦園中景十篇曾交碑碣記先賢而今得遇文章伯

合浦珠還豈偶然 託尙書瞻園碑現
寄隨園公將歸之

文章伯 孫述詩海內文章伯又
曹問詩海翁文章伯

哭高東井孝廉 有序

東井名文照湖州武康人高才博學父爲南捕

通判有廉名東井中甲午鄉試客死京師年三

十無子

風傳消息自幽燕聽說斯人不永年循吏兒郎好才子

一齊抹撥也由天

二十萬言書誦畢八千餘紙手抄忙不知一片心頭血
客邸誰收古錦囊

二十萬言

漢書東方朔傳年十三學書三冬文史足用十五學擊劍十六學詩書誦二十

二萬言十九學孫吳兵法戰陳之具鉦鼓之教八亦誦二十二萬言凡臣朔固已誦四十四萬言八

千餘紙

北史崔暹傳崔愨字長謙為青州司馬賊圍城二百日長謙讀書不廢手抄八千餘

紙

目空四海無前輩心折千篇有老夫此日等身諸著作
九原抱著見韓蘇

關情夜燭與晨燈甚矣吾衰仗後生豈料挈雲心事健
一枝秋桂了前程

題黃梁夢枕圖

非因非想夢難通人有心情各不同我過邯鄲曾有夢
夢攤書卷萬花中

心中賢人歌寄錢璵沙方伯

書中有賢人其人不可再心中有賢人其人宛然在其
人在何處聞江為屏藩吾幼與同學吾長與同官温公
愛蜀公生前為立傳吾亦愛錢公意欲書其善公書善
歐趙公詩善白蘇以兩善稱公淺之為丈夫

温公二句

司馬温公文集范景仁傳云余誠服之故作范景仁傳案范鎮字景仁蜀人也

天子南巡狩 璽書頒諄諄誠恐供張費累彼元元民
江督黃文襄陰違而陽遵孤行一已意東下如濕薪其
人養威重上相不敢嗔公乃手彈章焚香達 紫宸

天子立召見問汝所知因公奏御史官言事重風聞倘問所來由是絕言者根 天聽爲之動將黃訓飭頻有此小臣直彌彰

聖主仁一時王侯駭爭來窺公門以爲朝陽鳳以爲獨角麟誰知公恂恂公貌如婦人

金吾有邏騎獐獐虎而冠內府四十名白日橫行慣公視永豐倉此輩猶狎玩其魁名李五喧呶薄几案公怒械繫之封章奏玉殿 詔命盡革除爲首者誅竄百僚舞于衢路人相與嘆神羊挺然立百邪已消半何況鳴一聲根株自痛斷

彰化內凹莊生番殺黔首賴白兩姓家二十有二口故

事番作惡武吏有責成生番殺人重熟番殺人輕大吏爭護前各以熟番報公時巡臺灣獨以生番告洋洋海風起偏遲御史章奏騎旣濡滯所奏又乖張 天語加切責大吏滋不悅詞者來調停誑公改前說公指窗前山是豈可動乎苟其徇有位無以對無辜亡何矯虔吏買頭作証證事發得上聞昭昭黑白定

三吳民風柔俗吏恣威福但博大府笑不顧小民哭公莅觀察任上手無雷獄其一竟劾去其一稍瑟縮蠹胥擒五鬼積案掃千牘懷磚者改行舞文者坻伏片紙告誠張萬民雪涕讀傳抄未停手曲踊時頓足可惜僅一年旌旗遽入蜀民恨公來遲又恨公去速至今說公名

父老淚簌簌

五鬼

九國志南唐李璟即位馮延巳喜形於色俄拜諫議大夫充翰林學士復結魏岑侵損時

政與其弟延魯及陳覺查文徽等爭懷磚洛陽伽相推唱時人謂之五鬼又見五代史

土風俗淺薄郡守初至皆懷磚叩頭以見意及其代去還以磚擊之魏李延貴為青州刺史帝謂曰

懷磚之俗世稱難坻伏左傳昭二十九年蔡墨論治宜用好心腹

乃至若泯棄之物乃坻伏案坻音昏

古有班馬才能記非常事今有班馬才苦無事可記我

欲得公狀催公作郵寄公曰我生平碌碌無他異虛心

而實力祇守此四字大哉明公言四字談何易其惟聖

人乎當之庶無愧願公永勉旃徐徐俟其至我欲立公

傳恐公事正多我欲少遼緩又恐傳者訛故且托韻語

傳播為詩歌歌公更勗公公其慎晚節空山有故人含

笑看史筆

題幽光集後

王陸禔至高文照凡二十餘人

河嶽英靈氣未伸有才無命最傷神何時得上韋莊表

追賜科名十六人

韋莊表

全唐詩錄宰臣張文蔚奏文人不第者十人方干與焉皆追賜及第今作韋莊謹

案欽定全唐文有韋莊乞追賜李賀皇甫松等進士及第秦表然亦只十五人非十六也

所見

牧童騎黃牛歌聲振林樾意欲捕鳴蟬忽然閉口立

遠眺

秋江遠眺碧雲空一笑啞然對晚風鷓鴣鳥覓魚終日立

不曾肥過信天翁

信天翁 玫瑰記水禽名信天翁嘗開口待魚

雷別蘇州主人唐靜涵

君家久任竟忘家兒女同聲喚阿爺借慣舊書多脫線
代栽新樹暫停花商量小食先呈譜歷亂飛棋更鬪瓜
如此王賓能有幾戲將瑣事記些些

謝渤海相公賜老母人參

一朵慈雲下碧空萱堂頃刻起春風扶衰正想尋靈藥
造命由來屬相公價比兼金千鎰貴形如瑞麥兩歧同
殷勤手付家僮意小草無言有寸衷 公慮材官賚來有費牢賞故喚家僮

赴衙親封賜之

哭唐靜涵十二首

吳下霜飛九月天唐衢竟賦小遊仙傷心三十年中事
歷歷捫胸尚宛然

初飲華堂酒一卮青年意氣兩相知屏風窺客金釵滿
正是君家全盛時

奪得鸞篋返石城三郎懊惱不勝情是誰巧作鶯花主
不負黃衫俠士名 事載聰娘墓志

黃衫俠士 霍小玉傳王夢黃衫丈夫抱李生來至席凌晨忽有一豪士衣輕黃紵衫挾生

而至

從此雲龍角逐忙栽紅暈碧兩相將棣華書舍三間屋
便是儂家選佛場 栽當作栽栽紅暈碧見卷三落花詩第十首註

寒山聽雪倚斜曛鄧尉探梅踏白雲一輛籃輿兩枝槩
嬉遊何處不同君

護世城中美膳難多君親手製盤餐晨臆北雁商量處
忙殺何曾舊食單

護世城

酉陽雜俎兜率天上雨
牟尼護世城中雨美膳

龐公妻子都無避稽呂相思便駕車笑我身如春燕子
一年一度宿君家

龐公

後漢書龐公傳注襄陽記司馬德操嘗詣德
公值其渡沔上先人墓操徑入其室呼德公

妻子使速作黍徐元直向云當來就我與德公談
其妻皆羅拜堂下奔走供設須臾德公還直入相
視不知何稽呂稽當作嵇晉書嵇康傳東平呂安
者是客也稽呂服康高致每一相思千里命駕康
友而善之

為喝臬盧六子紅驚心風浪太匆匆忝為北海孫賓石
曾匿臺卿復壁中

孫賓石二句

後漢書趙岐傳岐字邠卿初名嘉生
於御史臺因字臺卿後避難故自改

名字示不忘本土也孫嵩字賓石岐逃難四方自
匿姓名賣餅北海市中遇嵩呼與共載岐懼失色
嵩乃下帷令騎屏行人密問岐曰視子非賣餅者
又相問而色動不有重怨即亡命乎我北海孫賓
石闔門百口勢能相濟岐素聞嵩名即以
實告之遂與之俱歸藏岐復壁中數年

漸漸清霜滿鬢來欣欣且喜老懷開衣衫質盡長生庫
猶入花叢醉幾回

長生庫

見卷二十二謝怙
崖郎中惠紗詩注

朱絃兩度斷琵琶聘得雲仙蔡少霞一夜長眠人不醒
繞床嬌女尙呼爺

蔡少霞 集異記蔡少霞夢為鹿幘人引至石碑之側謂曰召君書此俄有二童一捧牙箱內有兩幅紫絹文書一齋筆硯即付少霞凝神搦管頃刻而畢因覽讀之題云蒼龍溪新宮銘紫陽真人山元卿撰

今春置酒舞曹婆蹇姊彈箏阿子歌豈料人生真局促
黃公壚下卽山河

曹婆 元稹詩醉摘櫻桃投小蹇姊當作蹇姐繁欽玉嬾梳叢髻舞曹婆與魏文帝賤慨

自左驥史媿蹇姐名倡注文帝令杜夔與左驥等於賓客之中吹笙鼓琴其史媿蹇姐亦當時之樂人阿子見卷二十四山中行樂詞第十首注

早知此會成長別悔不勾畱再一宵量取長江盛老淚
君魂舍我更誰招

閱歷

閱歷名場四十春一言常自說津津久居軒蓋無佳士
不讀詩書有俊人

昭君

妾彈琵琶非自傷傷心還是為君王千秋幾個傾城色
一旦輕輕付遠方君王若果非知己妾亦甘心絕域死
如何賤妾遠行時詔書正選良家子良家子比妾妹問
旁人如不如

偶觸

偶觸危機黯自傷白頭無語立斜陽可能野谷空山裏
禁住梅花不要香

偶成

小倉山房詩話 卷二十一 梅花詩屋

安身浮世外行止自徐徐白鷺替迎客春風爲卷書
吟罷自書竹茶烟吹入窗輕雲含兩重孤蝶得花雙
一月關門任忘書記復清詩情似池水都向靜中生

悼花

梅花盛開時杏花若相覬杏花正紅酣海棠有爭意一
花復一花循環作交替容華非不佳過者便憔悴春風
非無情不能將花繫開落曾幾時在花如一世旁有看
花人淒然自隕涕

玩月

無月夜可憎有月夜可愛忽把爛銀盤揮之出門外恰
思人未來滿地月橫陳如何人一來月光飛上身思之
不可得掬之若可取忽然疎影搖梅花如欲語

自懺

仙人九障名居一上士關防口最先安得四禪天上住
一生風不到窗前

和沈觀察遊華山韻

仙人掌上馭風行玉女頭盆拄杖聲兩角孤雲天一握
千尋飛瀑月三更近招白雁烟中語遠望黃河樹頂生
擬把綠章奏闕闔滿腔心事沈初明

玉女盆

杜甫詩安得仙人九節杖拄到玉女洗頭盆

沈初明 陳書沈炯字初明

造假山

半倚青松半掩苔一峯橫豎一峯迴高低曲折隨人意

好處多從假字來

感往事有作 并序

子爲鳳齡事至今悵悵因憶己巳春卜妾平湖
有良家子楊氏許贈不許見事故中止及買舟
歸而其家追余往見則疴作不能行矣嗣後或
交臂失或來歸後又遣去舛午膠轕不一而足
大有悟於佛氏因緣之說故作是詩

綺麗情懷閱歷身青天碧海漫尋春每看遭際千般幻
始信因緣兩字真花到手時偏不折壁從懷後轉生嗔
暗中竟有牽絲者笑我徒爲傀儡人

牽絲

大真外傳明皇詩刻木牽絲作老翁雞皮鶴髮與真同須臾舞罷寂無事還似人生一世

山頂蘭

一枝幽草植山阿開旣飄零落又多不是無人采香色
其如生處太高何

謝悔軒公饋烏鬚藥

買染鬚藥如買酒年年一介馳京口欣逢長者陶通明
肯賜刀圭變老醜每對明鏡愁鬚蒼便趨華堂索秘方
果然諸毛餐黑水頃刻滿面消秋霜我聞度世真神仙
不忍獨自作少年又聞堯染臯陶舜染禹彼此沾濡聖
如許先生報 國恩無量常恐年衰意惆悵但見青葱
繞頰生掀髯一笑心還壯小人有母忘兒衰視我花甲

如嬰孩得教綠髻同潘岳勝舞斑衣學老萊旁人不知
笑吃吃道此兩人媚側室噫吁嘻君不見從古友朋膠
漆情紛紛擾擾堅白鳴何如同讀太元經

陶通明

南史陶宏景字通明

媚側室

見卷十四未一首注

臥鐘

一鐘倒卧鍾山坳后夔敲後無人敲宮商滿腹悄無語
草蟲亂叫秋天高我來駐馬急拊視爨乳模糊土花紫
篆文隱隱莓苔封露漬斑斑鉛水洗口寬千石容有餘
身重萬人扶不起憶昔橫陳寢殿中四廂九奏聲隆隆
會招鼉鼓聲相應會喚宮娥睡不濃一朝世事浮雲過
太常樂散金甌破尙有鈞天夢未終可憐小劫身先墮

鳥踏還疑鳧氏鐫雪飛似伴袁安卧飄泊泥沙不計年
摩挲幾度遇神仙牧童手小爭來擊佛子樓低不敢懸
我聞禹鼎長淪沒何況銅駝困荆棘聾俗誰為傾耳人
長眠且入無雷國別汝回頭感不勝千秋老物定神靈
年年霜降商山日可作鯨魚吼一聲

商當作豐本山海經

爨

鐘口兩角為爨周禮冬官考工記鳧氏為鐘兩爨謂之銑

無雷國漢書西域傳無雷國

王治盧城去長安九千九百五十里衣服類烏孫俗與子合同

寄陝西撫軍畢秋帆先生兼呈令舅張少儀觀察
九天臚唱掣金鰲三輔風雲擁節旄殿上策猶推賈董
關中功已重蕭曹軍興五載民如忘章奏千回帝總
褒想見終南山色裏一輪卿月比前高

春滿軍門有所思 百花頭上看花時 采風手纂長安志

感舊情深吉甫詩 公修西安志梓 已屈君平叅幕府 冬友

更招小戴作經師 敬 知公偶折金河柳也折人間第一

枝

小戴 漢書儒林傳戴德號大戴為信都太傅戴聖號小戴以博士論石渠至九江太守由是禮

有大戴小戴之學

下官銜本隸旌麾卅載身因奉母歸一面未曾瞻華嶽

八行先自賜珠璣游仙夢記風前遠隔水琴彈海上稀

多感羔裘千里贈教儂暫脫芟荷衣

聽說張敷任渭陽故人振觸九迴腸自然杖履身還健

多少雲龍事未忘半世韶華同逝水一門宅相好輝光

煩公代寄滄桑信最小袁絲髻已蒼

張敷 見南史 宅相 晉書魏舒外家起宅相者云當出貴甥舒曰吾當為外家成此宅相

附少儀觀察和詩

海上相期釣六鰲十年謂可建旌旄致身公自登蓬

閭草檄吾偏雜掾曹裘橐何曾羸陸賈樂章漫擬賦

王褒當年誰及終軍少作賦聲摩 漢殿高

白下於今有去思中牟化美漢京時直聲三上軍門

牘儒雅頻賡相國詩鰲面老人稱衆母烏衣弟子奉

嚴師尋春杜牧非遲暮幾度吟憐綠滿枝

懶從關塞擁高麾遽買春江一棹歸繞座光華發舞

鼎驚人詞賦擅璇璣神仙伴侶閨房滿鐘鼓園林俗

客稀盤谷有親康且壽肯將公袞換萊衣

笛聲淒切聽山陽感舊懷人幾斷腸四十年來京華故人零落殆盡

世閱冰霜元易老交深貧賤最難忘丹山近企將雛

信錦字遙分照乘光一事報君堪大噓齒牙落盡似

張蒼

偶閱廣輿記載盤古冢凡有三處其附會可知然

題目自佳戲題一絕

無人挾長居前輩有力開天看混茫底事一坏先作俑

神仙畱着讓軒皇

答朱海客先生見寄

未見投一札已見投一詩先生於鄙人殷殷如有私我

昨過京口離家月已期忍住欲歸心走叩先生扉先生

方擁帳說經爲人師地居寶晉齋米顛所畱貽卷簾金

焦落穿庭鳥雀飛呼兒出見我森然兩瓊枝解作銀鈎

楷能歌幼婦辭我受僕夫促身坐心已馳胸中千萬語

如蠶未吐絲不恨相別速只恨相逢遲何時得重來定

有江雲知

寶晉齋宋史米芾遇古器物書畫極力求取必得乃已立寶晉齋貯之坐起玩拊精於鑒裁

一經品題
價增數倍

香亭弟僦居白門來往甚懽今年服闋有仍赴蜀

中別駕之行予老矣難乎爲別賦詩送之

送汝萬里行戴我一頭雪未免老人情含笑看金玦憶

昔壽春去尚且情依依矧今蜀道難知汝幾時歸汝歸
自有時我年恐難待阿通才三齡仙風吹不大何田復
何圃幾書又幾琴錄冊交與汝汝應知我心

汝家多弟昆我家多姊妹從子及孤甥因之各成隊一
人一婚嫁向平力不勝若不藉微祿此累何由清汝非
貪官職衰年捨我去我非吝一塵不肯留弟住展轉復
展轉兩家事艱難羨殺脊令鳥雙飛共一山

前年弟歸來買園與我鄰公然東西屋兩邊任機雲風
和兄嫂往雨晴叔姒來庖奴鬪羹好小婢報花開似此
天倫樂一日抵千霜如何青天月團圓難久長池塘春
草生阿連不可見分後紫荆花風前顏色變

歐公居潁上瀧岡悄無人似昧首邱義論者常紛紛我
於隨園旁卜兆葬顯考生壙附其間較歐稍為好終竟
大母墓尚在西湖西歲雖遣人祭此心常悽悽兩家小
兒女結婚須故鄉庶幾寒食節容易紙錢將

瀧岡 歐陽修有瀧岡阡表

隨園兩山凹垣墻無所施邱壑雖云佳居室非所宜笑
我煙霞癖經營三十春一水與一石處處精神存古來
高人宅多捨作蘭若我乃無懷民豈是佞佛者乞汝改
家廟祀我於西齋或者峴山巔叔子魂歸來

仙人有九障虛名是一端宏景曾此累而我亦復然桂
冠三十載著書一尺餘已付麻沙本憑人作毀譽所嫌

八卷山房詩言 卷二十五 三
在官日惠民無寸功輿歌太詭衆聞之兩頰紅宋儒伊
川子作狀狀伯醇傳兄無溢詞所貴傳其真

麻沙本 見卷二十四
末一首注

我年十八時叔父客西粵託我身後事諄諄寄手札此
札藏篋內隨身不敢離燕南與趙北時時偷眼窺迎叔
歸葬畢拜向靈前焚泣陳無所負可慰九原人我今學
叔父一一付驪歌望弟學阿兄弟意將如何

意有所得襍書數絕句

一樣三株木筆栽兩株萎謝一株開分明草木尙如此
何況人間才不才

擲果當年事已休閒來曳杖水邊遊無端樹有撩人意

紅杏一九打白頭

滕六才終巽二飄枝枝修竹劾芭蕉階前只有薇蘅草

偏在風中不動搖

滕六巽二

牛僧孺幽怪錄蕭至忠爲晉州刺史欲
獵有樵者於霍山見有一長人俄有虎

兕鹿豕狐兔襍駢而至長人曰子九冥使者奉北
帝命蕭使君收汝輩若干合鷹死若干合箭死有
老麋屈膝求救使者曰東谷嚴四善謀試爲求計
羣獸從行至深巖有黃冠一人老麋哀請黃冠曰
若令滕六降雪巽二起風卽蕭使君不復出矣昨
滕六喪偶得美女納之則雪立至巽二好飲酒得
醇醪賄之則風立至有二狐自稱能取之
羣獸散去翌日風雪大作蕭果不出獵
沈約有脩竹
彈甘蕉文

薇蘅草二句

用水經注案本
草引此蘅作銜

芭蕉句

自尋低竹補籬笆雨後高雲襯落霞驚去鴛鴦真得意

雙雙全上合懽花

碧桐一樹倚雲端五月離離雪蕊攢壓屋濃香高百尺
世人忘却當花看

老去年來目力微回黃轉綠認依稀落花裊着游絲颺
錯認空中蝴蝶飛

全家試水泛輕舸小妹張篷阿姊搖喜極兒童雙手戰
釣竿絲上一蝦跳

常自閒中玩物情碧欄杆外作游行香蘭性愛風前種
爭怪詩人不好名

莫說光陰去不還少年情景在詩篇燈痕酒影春宵夢
一度謳吟一宛然

孫勗堂舍人殉難金川其門人汪燾以遺像屬題

舉世紛紛都畫像畫成幾個傳人樣汪倫持像索我題
卷雖未展神先王道有先師孫太初槃槃才子擅名譽
曾將水榭風廊意寫作人間行樂圖一朝捧檄馳西蜀
正值天兵剿蠻觸強著書生短後衣也隨主將抽金僕
妖星半夜落危碣疋馬無聲陷賊巢束手姜維投鎧仗
甘心光弼用靴刀泣語家奴莫悽愴男兒報國真無狀
速取冠巾一物歸好教兒女招魂葬天恩頃刻下明
堂錫典榮生綽楔光可憐太死終軍早不見頭懸南越
王門生風義高前古展卷淒涼淚如雨豈料當初翰墨
緣竟成此日丹青譜我與斯人一見難敬題短句發長
嘆願將此本描千幅當作金鑄范蠡看

姜維蜀志姜維傳維尋被後主敕令光弼唐書李光弼傳
 光弼將戰納刀於靴曰戰危事吾位三公終軍漢
 不可辱於賊萬一不捷當自刎以謝天子
 終軍傳軍說越王越王聽許請舉國內屬天子大
 悅賜南越大臣印綬壹用漢法以新改其俗令使
 者畱鎮撫之越相呂嘉不欲內屬發兵攻殺其王
 及漢使者皆死軍時年二十餘故世謂之終童
 金鑄范蠡吳越春秋范蠡乘輕舟浮五湖莫知所
 終越王令工以良金鑄象置之座側朝
 政夕論

揚州康山詩爲主人江春作

青山如高士不肯居城中難得邗江城
 中藏一華峯相傳棲息者昔爲康武功
 於今屬江淹規址增穹隆綺寮花歷歷
 月榭煙重重我來逢日暮海棠開深紅
 高登九層臺恍入凌霄宮近覽一郡盡
 遠極諸天空指掌月欲

墮乘雲仙可逢凜乎難久畱此身非孤鴻

康武功明史康海字對山武功人也

竹垞會題詩有約江春到主人名姓同
 巧合如天造在昔楊憑園香山來憑眺
 蕭復舊樓臺王縉領其妙江山怕冷落
 羅綺須炫耀君今繼前徽風雅有同調
 宜乎海內人爭買邗江棹上迎丞相車
 下招居士屨分領邱壑情合參仁智樂
 燈紅花不落酒滿月常照康公如有知
 凌雲應一笑

楊憑二句窮幽記白樂天得楊憑竹木池館有林泉之致因爲池上篇題曰都門風水

木之勝在履道里白蕭復二句唐書蕭復家貧將氏叟樂天退老之地

相王縉聞其林泉之美心欲之乃使弟絃誘焉曰足下之材固宜居右職如以別業奉家兄當以要

地處矣復曰僕以家貧而鬻舊業將以拯濟孀幼耳倘以易美職於身令門內凍餒非鄙夫之心也乃罷復官沉廢數年復處之自若齊書張融傳融病卒遺令建白旌無旅不設祭令人捉塵尾登屋復魂曰凌雲一笑遺令建白旌無旅不設祭令人捉塵尾登屋復魂曰吾生平所善自當凌雲一笑

贈朱子穎轉運卽以畱別

曾騎竹馬侍尊公五十年華逝水同敢以通家參末坐

偶因招隱接清風枚十二歲受知於尊人糧儲公今六十二矣平山影落雙

旌上燕寢秋生一雁中難得王濛齊抗手開樽談到漏

聲終謂夢樓太守

平生秋月比襟懷小李丹青大謝才愛向蜀江看峽險

嬾從秦棧叱車回九重語密恩仇忘公弔某制府云三年畢竟能淹我一

語何曾敢負公萬里遊多眼界開莫怪使君風骨冷泰山頂上

抱雲來

讀罷秋原校獵篇三唐音節八風宣雲中金翅身摩地

塞上霜笳響入天惜我雄心聽已老借公如意舞猶顛

相傳手射潢池賊真個天狼蚤避弦天狼蚤避弦公集中句

金翅鳥名沈彬詩金翅動身摩日月

白髮征夫別畫堂主人情重費周章佩貽屈子三湘草

心表南豐一瓣香蒙贈素蘭香珠出岫雲仍歸舊壑入林鳥尙

戀斜陽從今地有鶯花王杜牧揚州夢正長

南豐句陳師道詩向來一瓣香敬祝會南豐案南豐名鞏后山師之

舟中間鐘聲有感於先賢考亭之語賦詩箴之有

朱子在南安夜聞鐘聲大懼曰便覺此心把握

不住

半夜聞鐘聲此心隨鐘往彼來非惡聲此去非妄想緣
何考亭子自慙把不禁分明儒學淺墮入禪學深子在
齊聞韶何常不動心

哭劉介庵 有序

君名景福山西人歷宰福清江浦諸邑最後降
真州丞以壽終

善人與道適不在親簡編醉人墜無傷由於其天全我
友介庵子通籍五十年牽絲閩海地投老邗江邊其人
性夷垢土色而敦顏不以矯虔逞不以苛廉傳所到識
政體吏民靜且便清俸一上手萬弩如開弦縣僮為王



進門幹替持錢偶聽半曲佳柘枝舞欲顛偶愛一伶美
纏頭費百千堂前燈似海棠下酒成川甯可斷炊火不
可無管絃旁人代眉蹙慮其生計艱君但掉頭笑萬事
且由天未渴莫掘井未寒莫思棉卿自行卿法我自有
我憐果然負課萬竟能脫罪愆弄兒將恩報破產來爭
先大吏知君愿當作老物憐藍田縣丞記許其讀終篇
古稀已過四才命將車懸朝雖將車懸夕已歸道山畢
竟行樂死終身無憂煎我昔宰棠邑年少如任延君來
作交代見若平生懽受馬不數齒穿錢不算緡感君意
豪健使我心纏綿從此忘客主雲龍樂事偏有時我外
出歸家鼓喧闐問是何為者君代張華筵子旗與子尾

兩室如一焉。歷歷事雖往，依依夢常牽。今秋君病篤，我呼渡江船。握手不能語，猶問老母安。遲君半日死，補我一面緣。方知素心人，永訣非偶然。君家汾晉任，旅櫬何時還。有妾未四十，髮髮垂雙肩。有婿治喪事，踈踏張空拳。未能計日後，能無悲當前。我亦六十叟，海內無同官。知作幾時別，老泪空涓涓。

藍田縣丞記

韓愈藍田縣丞廳壁記爲崔斯立作

黃信生獨立圖

四瀆水獨流，一月光獨吐。只緣依傍空，獨有萬萬古。我友信生子，清才老吳楚。瘦削若植鰭，飄飄欲霞舉。偶畫獨立圖，四顧無儕伍。敢希魏裴俠，高標立天府。庶幾唐

杜陵蒼茫咏詩苦，我亦孤詣人。蹲然手獨舞，平生所知交。落落均堪數，甘爲夔足一。恥作晉耦五，何時祀膺行。全入無雙譜。

植鰭

荀子伊尹身如植鰭

魏裴俠

北史裴俠傳俠嘗與諸牧守俱謁周文周文命俠別

立謂諸牧守曰裴俠清慎奉公爲天下之最令衆中有如俠者可與之俱立衆皆默然周文乃厚賜俠朝野服焉號爲獨立使君

秋蚊

白鳥秋何急，營營若有尋。貪官衰世態，刺客暮年心。附煖還依帳，愁寒更苦吟。憐他小蟲豸，也有去來今。

白鳥

大戴禮夏小正八月丹鳥羞白鳥注丹鳥丹良也白鳥蚊蚋也羞進也

偶成

白髮對花落悄然心不安未知來歲發可有老天看欲
掃且停帚將歸更繞欄多情蜂與蝶伴我忍春寒

病足

明明聖賢途見到行不到誰知大體然小體亦相效右
足忽病瘡左足徒踟蹰一柱雖支梁孤槩難移棹望山
無時登聞酒先辭召想栽花近床妬殺竿垂釣豈無張
湯摩難學漢王跳未免山魃欺兼招跛鼈弔我道身何
衰六十先已耄蕩蕩天門開捷足讓年少平平王路寬
蹠躩疑陷淖羨彼蟲豸行升堂還入奧輸他落葉飛隨
風尚騰趙一屨一跣腓將為管子笑我謂子胡然用短
最扼要兀者占王駘喪足乃入道更有臙將軍斫白張

旗轟珠玉本無脛從從走燕趙何況我山翁高風原坐
嘯但宜卧悄悄不煩行僬僬借此自夷猶足疾奚須療
永斷沒階趨將毋非禮蹈例可免送迎心堪釋煩躁靜
處光陰多閒中著作妙弟子自來學先生免往教雖非
希哲貴居家時乘輪或惹美人憐碧玉回身抱

踟蹰

莊子秋水篇吾以

張湯摩

漢書張湯傳湯有

山魃

所愛史魯謂居病

魃

音宵山魃出

一跣

獨足鬼也

腓

音背山魃出

夜喜

犯人名曰魃呼其名則不能犯也

一跣

音背山魃出

履注

諸侯犯罪者令著一隻屨以恥之腓脛臑也

臙

將軍二句

王駘

莊子魯有兀者王駘從

臙

將軍二句

傳孫臆

嘗與龐涓俱學兵法涓既事魏恐其賢於

臙

將軍二句

竈法誘涓伏兵馬陵乃斫大樹白而書之日麗涓
 死於此樹下涓果夜至斫木下見白書乃鑽火燭
 之讀未畢萬弩俱發乃自刎死從從本音疎疾貌焦焦本音焦明
 俱趨走貌禮記庶人焦焦珠玉無脛吳志孔融書云珠玉無脛而自至

癩

頑癩如頑妻一來不可黜附體二十年爬搔晝夜徹病
 類伯牛癩形同豫讓漆其性更陰狠乘隙乃作賊不生
 面目間似畏見日月好據尻脰罅蟻蚤所不屑如草多
 蔓延如蠶慣齧齧非仇苦糾纏非親強狎暱知我肅大
 賓故意將肘掣俾縮傲禪中王猛如捫虱有時卧香衾
 蠕蠕作蟲嚙黦我侍者勞麻姑爪盡折我怒攻討之克
 敵占見血初將礮石敷繼用毒藥熨痛極癢始差東平

西又凸小敗勢轉張暫稀發愈密神農藥不靈扁鵲醫
 無術有客為我言除惡何須絕人生食煙火疇能免濕
 熱借彼作消導亦足免他疾譬如大廈居不必熏鼠穴
 又如護水隄區瀦任宣洩矧是皮膚累並非心腹孽何
 不包容之聽其自生滅我亦無奈何姑且聽客說甘作
 痕痕人永少清淨日吾及汝偕亡一笑萬事畢

伯牛癩

論語伯牛有疾注先儒以為癩也

豫讓漆

戰國策豫讓又漆身為癩

尻

脰

尻當作尻音考平聲與尻別脰音誰脰也漢書東方朔傳連尻脰

捫虱

音書王猛傳桓

溫入關猛被褐而詣之一面談當世之事務捫虱而言旁若無人溫察而異之

竹林寺

晚過竹林寺斜陽屋角沈風燈紅不定煙柳綠彌深僧

少磬常寂樹多晴亦陰耳根疑佛語鈴鐸有清音

鈴語暗用晉書佛圖澄事

平生觀書必摘錄之歲月既多卷頁繁重存棄兩難感而賦詩

愛書故看書看罷書已走何以強留之廢心轉用手悠悠三十年兀兀極卯酉食雞必取距占星常指斗有如養蜜蜂百花無不有但可備采掇不必計用否又如大官庖甘苦皆上口旨畜盈萬千搜牢費八九一朝卷束之淒然傷白首欲作楹下藏未必六丁守欲當堯典殉空與骨俱朽不如問蒼蒼教吾傳某某

楹下藏

本晏子鑿楹納書事

六丁

見卷廿二得玉尺詩

堯典殉

後漢書周磐傳

磬令二子曰命終之日編二尺四寸簡寫堯典一篇并刀筆各一以置棺前示不忘聖道

淮上權使伊蘆也先生手書索枚全集先生乃故

長官李觀察永標甥也銜恩感舊奉寄二章

淮北牙旗捲朔風淮南招隱到山中卅年名姓能知我

一代風騷信屬公

公札中有三十年來久欲學業之語

手答長箋揮倚馬

心憐小技問雕蟲緣何卿月當天滿偏炤幽棲草一叢

御李當年有舊恩曾持手板謁清塵誰知屏後窺探客

即是

天家柱石臣

公云曾在李公屏後見故

老去自憐知己盡書

來重見愛才真何當遠泛清江棹白髮追陪話夙因

題陳省齊大守雲溪書屋圖

憶作麤官日曾經侍大賢琴尊爭往返簿領共周旋彼

此形骸忘官階禮數捐先生方綰綬賤子蚤歸田分手
 情猶摯推襟意更憐簫聲朝置酒燭影夜題箋九月花
 黃日三春雨細天攜孫入山裏問字到堂前玉貌驚雕
 武鴻才愛服虔餘情忝媒灼納幣聘嬋娟公長孫熙娶於錢氏枚爲
 執柯冉冉雲煙度悠悠歲月遷量移山左地辜權水衡錢
 語笑風吹斷音書雁代傳卅年如夢過八秩未華顛剩
 有丹青畫能描陸地仙庚桑風拂拂丙舍樹連連童子
 將書立閒鷗倚檻眠貌如松鶴健瞳映水雲鮮故吏雖
 衰矣披圖尙宛然願言打雙槳來訪五湖煙

雕武

張雕武也

辜權

見卷二十四題萬華亭持籌握算圖詩注

覺衰

甚矣吾衰百不如齒牙零落髻毛疎花間愛曳隨身杖
 燈下愁看小字書偏把事忘應記處慣教氣損劇談餘
 須知逝者如斯耳老說聰強總是虛

挽梅式菴

讀史研經四十春終嫌竹素少傳真九原此去無他樂
 看見古來無限人

題畫

村落晚晴天桃花映水鮮牧童何處去牛背一鷗眠
 謝胡誠齋觀察送瓜

綠沉瓜向草廬投捧得雕盤暑漸收碧玉幾團隨手削
 紅霞一嚼滿庭秋分明西域來佳種慚愧東陵作故侯

願着荷衣捧仙果南皮池上奉清遊

再謝賜鮮荔枝

投瓜慚未報瓊瑤仙荔重敎擘絳綃香色品來真一絕
海風吹未過三朝形同玉李膚尤嫩味借甘棠露不消
欲假公恩咏嘉樹試將仙核種山椒

養馬圖

養馬真全養士情香其供奉要分明一挑芻草三升豆
莫想神龍輕死生

十二月十五夜

沉沉更鼓急漸漸人聲絕吹燈窗更明月照一天雪

永福菴贈餐蓐上人

山髻當窗滿松欵落袖輕老僧雖寂寞歸有一花迎

元旦

暉暉晴日表元辰漸漸柴門草色新閨歲梅花猶蓓蕾
通宵燭影尙橫陳公然白髮三朝客又領東風一日春
未賀賓朋先賀我堂前九十四齡親

喜魚門王事改官編修

一行 丹詔下蘭臺海內風人笑口開爭說 聖朝能
得士此官終見此人來

明中官降暗中遷天眼遲開四十年可似修真老張果
白頭才許作雲仙

天眼

蔡文姬胡笳十八拍云爲天有眼兮何不見
我獨漂流又見五代史漢家人傳蔡王信語

笑問花磚影若何當年老子也婆婆忝爲先輩無多日
只隔迢迢十六科

答大廷尉王蘭泉先生見寄詩扇

有序

先生名昶以吏部郎從阿將軍桂征金川同行
者趙文哲等俱歿於陣而先生獨奏凱旋論功

擢廷尉

誰佐平西第一功漢家廷尉重于公心憐舊雨貽紈扇

身出重圍感塞翁皓首軍機雙髯雪高冠孔翠一翎風

遙知清瘦書生貌畫上凌煙便不同

公以軍功賜孔雀翎圖形內府

殺賊金川當壯遊寶刀光裏萬貔貅雲山看到中華外

鼓角聽殘白帝秋半夜天星摧上將一軍風鶴起深愁

斯時代作孤臣想可有生還兩字不

且喜謀叅李藥師生擒頡利返牙旗手書露布三邊讀

甲洗銀河萬馬知草檄已完孫楚事從軍應賦仲宣詩

何當洗耳華堂上聽說蠻溪苦鬪時

李藥師

唐書李靖字藥師

孫楚

晉書孫楚傳楚年四十餘始叅鎮東軍事文帝遣符

劭孫郁使吳將軍石苞令楚作書遺孫皓

故人踪跡久離羣記否蕭齋酒半醺打槳舟忘桃葉迎

謂贈婢事

磨崖字許小山分

公鐫澄碧泉三字在隨園假山

思量鴻爪痕常

在傳說鶯遷信屢聞此後袁絲休惜別舉頭天上見卿

雲

讀道古堂集弔杭堇浦先生

平子才華賦兩京禮堂經義屬康成殿前放膽陳封事
海內甘心奉盛名一代官多徵辟少百年人重甲科輕
等身著作分明在可學歐公畏後生

歸隱湖山笑眼開誰知方朔歲星哉橫衡一世談天口
生就千秋數典才萬卷堆中碁局響三貂座上緼袍來
傷心此日風流盡江左靈光半夜臺

方朔歲星

漢武內傳王母遣使至東方朔死上疑問使者對曰朔是木帝精爲歲星下遊人間以觀天下非陛下臣也

新正十日聞陶衡川孝廉之訃因思去年秦學士
礪泉梅式菴公子皆先後委化曹子桓云旣傷逝
者行自念也感賦一詩

一度秋風一逝波故人零落漸無多蒼天畱我忙何事

日日桓伊唱挽歌

桓伊句

晉書袁山松傳初羊曇善唱樂桓伊能挽歌及山松行路難曲繼之時人謂之三絕時張湛好爲齋前種松柏而山松每出游好合左右作挽歌人謂湛屋下陳尸山松道上行殯云

卽事

盆梅三株開滿房主人坐對心相忘偶然入內女兒怪
問爺何故衣裳香

寄江橙里主人借西磧山莊

當年曾被梅花引得到蓬萊最上巔今日將身棲下界
不禁清夢繞諸天

幸喜劉盧仙籍通舊相知是主人翁數行代勒鄉嬛記

也算磨崖第一功

主人命作西
磧山莊記

劉廬

李商隱詩但驚茅許同仙籍不道
劉廬是世親注謂劉琨廬諶也

三年聞說無人任綠滿空庭草未除我與閒鷗謀拜賜
水邊林下各分居

平生蹤跡等搏沙料理雲煙頗自夸豫辦青溪茗葉帚
爲君石上掃殘花

騰嘯臺高萬嶺低獨眠人往怕孤悽未知紫府清嚴地
可許劉綱挈小妻

伯通庶下暫棲遲敢學鷓鴣占一枝幾朵雲生幾楓落
定書花葉報君知

伯通句

漢書梁伯鸞烏賃春
於臯伯通庶下

不借荊州借太湖買山有券借山無遙知三萬六千頃
一笑公然付老夫

哭陳省齋太守

八旬解組任鴛湖書屋雲溪有畫圖忽報神仙歸碧落
應教故吏服衰纁文孫才大功名晚

謂梅
峇

太守官清老

興孤白髮參軍倍悽絕同僚海內一人無

雲溪畫圖

見前題雲溪
書屋詩題

題亡友梅式菴畫冊

數盡天難問才高藝自精斯人雖萎謝遺墨尙縱橫氣
得山川秀神含水木清休言小遊戲卽此見生平

識面長安日題襟白下時卅年如昨耳一別竟何之絕

好佳公子居然老畫師相知慙未盡頭白泣袁絲

佳公子

史記平原君列傳贊平原君翩翩濁世之佳公子也

德定圃先生卸漕帥事巡撫閩中與夫人雙壽索

詩

蕭何轉漕卸雙旌常袞頒春到越城半壁東南恩已徧
六旬花甲歲初更文章自得中和氣瀟灑兼辭幹濟名
此日軍門牙纛靜花苗螺女盡懽聲

憶昔追隨步木天一番春夢尚依然後生許我稱名士

前輩驚公更少年

在翰林時故年二十四公年二十一

閭闔門多鸞振翼

公歷內務府國子監吏兵工各衙門

溪山秋老鶴歸田蓬萊久別還相認

邂逅揚州又拍肩

丁丑公扈蹕揚州見於行宮門外

儂家仲氏學吹簾也領春風侍絳帷玉鑑冰衡無遁物

珊瑚鐵網有高枝生徒負笈來千里兄弟焚香禮一師

常共子由聽雨坐歐陽門下說恩知

家弟樹癸未春闈出公門下

徵詩箋到士林聞爭寫瑤池琬文共仰金仙飄綠髮

更看王母擁紅雲花開並蒂春難老酒進雙卮飲易醺

慙愧袁絲相隔遠吹簫輸與武夷君

六月菊

寒菊公然冒暑黃蒼蠅側翅遠相望東籬共訝西風蚤
秋士偏貪夏日長試把一燈來照影焉知六月不飛霜
數枝冷艷當階立愁殺紅蓮不敢香

題夏山圖贈曹谷堂

夏山有景奇如許畫家有手誰能取董生北苑貌得之
藏在人間忽飛舉畫雖飛人能摹徐王二手成此圖我
當嚴冬雪後展卷看宛若四五月行深山叢叢萬木
雨欲滴莽莽一氣雲相連扁舟何處來盪漾迷濛天牧
童驅黃牛後先分著鞭板橋有人煙中語茅屋幾椽花
外偏遠望層巒疊嶂不知幾千里對之但覺飛濤空翠
生衣間據云臨摹此本已第七墨彩淋漓猶繞筆董生
委化雖千年紙上招呼如欲出谷堂先生信解人上手
當作共球珍當頭一跋妙絕倫更索我詩張其軍我見
此本勝見真恍如身到桃花源急驅煙墨題數言願君
傳之世世萬子孫

琴城課士圖爲盧太守存齋題

君之外舅古賢者曾以封章薦終賈

廣西撫軍金公

君之先人

撫我鄉

諱焯

至今遺愛民難忘爾我通家未侔面四十

年來才一見往事都從夢裏談回頭幾度滄桑變授我
琴城課士圖命題詩句當笙竽開看一片青衿色桃李
公門萬萬株泮宮峩峩起兩廡羅羅疎干旌來子子兼
從走踈踈圉人繫其馬校官將其鬚或執經以請益或
握管而躊躕更有嬰媿小公子手持如意來嬉娛鱸堂
講罷高揚觶江風遠送斜陽至使君欲起尚畱連恐有
秀才來問字此事依稀十數年使君五馬賦鶯遷詣學
雖無何武駕聞歌還說子游賢我亦當年一貧士蒙師

教育皆如此白首難忘知己恩長安寄信訪兒孫今朝
得遇師門壻不覺淋漓涕如雨宛然舊院一蒼頭忽見
小郎如見主更喜憐才意思同丹青畫出舊家風他年
官到中丞日定有聲名繼兩公

何武

漢書何武傳武行部必先卽學官見諸生試其講論問以得失然後入傳舍

哭程荆南明府

望見金焦眼便紅哭君兩世半年中

尊人春間先去世

詩才一

代清無敵德政三湘感未終宦海波濤天外落騷壇旗

幟眼前空去時畧說西歸意五百袈裟候下風

歿時見五百僧

相迎案五百袈裟用唐元宗事見卷十四末篇尺八句補註

屈指交情十七年同吟同醉更同眠風窗折竹疑聽雪

月夜乘槎欲上天無盡燈常明綺席有情花亦乞吟箋
如何小別橫塘雨一隔音塵便杳然

題袁蕙纒南湖圖

吾宗有賢者一見使人古學爲漢唐文筆力如牛弩屢
困公車試再上慙不武示我南湖圖其中有衡字將終
老於斯蕭然樂環堵我偶展丹青恍若遊元圃蒼蒼遠
峯蹲落落長松舞閒倚石爲梁靜看雲出府花影人過
橋水聲舟蕩槳平生未讀書此間真可補直是羲軒民
豈徒羊求伍非飲山泉甘那知井泉苦寄語樵父仙我
來風莫阻擬到溪流邊同把游魚數

羊求

見卷七題沈凡民蘭亭卷子第二首注

七月二十三日阿遲生

六十兒生太覺遲即將遲字喚吾兒高禩久祀心都倦

燕姑初來夢恰奇鍾姬入門前一日悔賣琴書還想贖

怕看湯餅轉生悲萱堂握手彌留際猶問懸弧是幾時

海內爭傳伯道名今朝湔雪賦添丁長成未必衰翁見

有後姑教薄俗聽老樹着花秋色好餘霞返照暮山青

豆盧甯傳分明在合授雙雛各一經

北史豆盧甯傳甯初未有子養弟承恩子

勤及生子讚親屬皆請讚為嗣甯曰兄弟之子猶子也吾何擇焉遂以勤嗣時人以此多之

尹三公子璞齋觀察蕪湖相晤白門喜而有贈

折花使者遞名箋知道通家見有緣蒔花人李姓者先三日傳到名紙

廿載青溪成契濶一朝丹詔許旬宣渡江歷歷前生

夢到眼依依故國天聽得著民私地說當時公子最翩

翩

觀察晨趨帥府忙軍人一半喚三郎竭來門外聽官鼓

恍憶兒時上學堂洗硯池應畱墨漬題墻字可剩偏旁

西園舊是君家物早晚還君望正長

相公門下老袁絲也算甘棠樹一枝沿路先教探安否

升堂各自認鬚眉照來悲喜燈俱笑說到滄桑酒不辭

重入桃源莫相訝仙山樓閣倍參差

此去牙旗鎮上游天門山色捲簾收擬招荆樹來千里

更奉慈雲擁八騶君奏請六弟似村奉太夫人就養訪我定播雙漿月

小書山房詩注 卷二十一 五 梅花詩屋

開關先放一輪秋何時得遂詩人志把筆同登太白樓
附觀察和韻詩

名園粉壁舊題箋宦蹟重尋信夙緣載酒居然同杜
牧趨庭猶記認彭宣燈明水榭三更夜桂放秦淮八
月天策馬來朝還過訪蔚藍深處影聯翩
買得青山日日忙江南遊客舊清郎英雄晚計成芳
墅巖壑遺身戀草堂解組半生花遶座校書他日子
隨旁我來正值懸弧候莫嘆如絲鬢髮長
遙從山館寫烏絲似折梅花贈遠枝千里縱如同握
手一尊那得共開眉官廳翻見身多累親老難言祿
易辭極目吳頭與楚尾嵐光隱隱水差差

石頭城畔溯前遊到處風光入眼收畫舫西園慙倒
屐油幢北府悵鳴騶重來頓覺河山異高宴空驚草
木秋幸有故人袁淑在朗吟同上謝公樓

甘露寺感舊呈夢樓主人 并序

己未冬予乞假歸娶路過京口值商寶意前輩
為郡中司馬命公子某陪遊甘露寺今四十年
矣中秋前一日王夢樓侍講招飲此間追憶前
遊悽然有作

記得當年此地經雪花寒重錦袍輕酒邊緣綠髻初垂影
山上蒼松半未生卅載韶光春易過一條狹磴老難行
憑闌暗轉衷腸事江水無情浪有聲

木天署裏老詩翁曾縮仙符碧海東要把江山付詞客
特教公子伴花驄西州賓從人重到北海琴尊事已空
難得多情王太守開筵重與醉西風

舟過平望訪張看雲居士不知其已亡也雷詩哭
之

滿擬故人在停舟問起居誰知雙目瞑已是一年餘總
帳風前卷殘花雨後疎九原知我到悲喜定何如

弱冠長安遇雞壇第七人

丙辰在李玉洲先生家與曹
鱗書沈椒園諸公結吟社

各彈游子淚全惜客中身脫手一錢贈分甘半盞春至
今回首憶風義感雷陳

鶯脰湖邊屋高樓見水光卅年三領畧萬事幾滄桑棋

罷柯雖爛舟移壑未藏請看鄴侯架堆積尙琳琅

桑榆收晚景作客古揚州畫重連城壁詩輕萬戶侯看

花醉金谷築舍老菟裘華表魂應在年年化鶴遊

詩輕萬戶侯

杜牧詩何人得似張公
子千首詩輕萬戶侯

松下作

小住倉山畔悠悠三十春蒼松都已老何況種松人

梅

正月東風柳未芽一庭梅影雪橫斜重他身分緣何事
只爲能開冷處花

讀淮陰侯傳

滅楚身提百萬師知公含笑了無奇英雄第一開心事

撒手千金報德時

千金報德

史記淮陰侯傳信為楚王都下邳信至國召所從食漂母賜千金

老來

老來不肯落言詮一月詩才一兩篇我不覓詩詩覓我

始知天籟本天然

帆

一葉帆高掛千舡水作聲靜聞舟子唱猛見浪花迎張
處休教滿收時自覺輕從來人失足轉在順風行

雨中志感

徹夜淋浪屋瓦鳴雨如相約赴清明山中易放惟花柳
世上難收是姓名月桂根高終不落沙鷗船過也虛驚

放翁自有安身法一個齋顏心太平

花朝日戲諸姬

花朝時節祭花神片片紅羅縛樹身爭獻百花生日酒
不知誰是似花人

百花生日

提要錄唐以二月十五為花朝韓偓詩每遇百花生日日未曾悽斷似今朝

阻風京口

已出三江口難拋百丈牽一帆如懶婦終日但高眠

百丈牽

演繁露劈竹為大瓣用麻繩連貫以為牽具是名百丈杜甫詩吳檣楚柁牽百丈蘇

軾詩百丈休牽上瀨船





